

四庫全書

集部

欽定四庫全書

明詩綜卷三十

翰林院檢討朱彝尊編

沈周

二十一首

周字啓南長洲人景泰中郡守以賢良應詔辭

不赴有石田先生集

文徵仲云先生詩但不經意寫出意象俱新可稱妙絕一

經改削便不能佳何元朗云石田詩有絕佳者但為畫所掩世不之稱

王元美云石田詩

如村童唱榜歌亦自清雅可聽一歌滄浪便無餘興

靜志居詩話石田詩不專仿一家中晚唐南北
宋靡所不學每於平衍中露新警語人既貞不
絕俗詩亦變而成方惟七言律詩差少全辭句
如明河有影微雲外清露無聲萬木中落木門
牆秋水宅亂山城郭夕陽船竹枝雨暗蠨蛸戶
豆葉風涼絡緯籬剪取竹竿漁具足撥開荷葉
酒船通牆凹為避鄰居竹圓熟多分路客瓜酒
醉又移花下席書多別起竹間樓青山一枝付
歸客玉洞千花留故人竹裏行厨青玉案酒邊
官妓茜紅裙片帆南浦草仍雨斗酒長亭花又
風歲晏難豚鄰社鼓秋深鰕蟹水鄉船芭蕉夜
雪闌新興蛺蝶春風卷畫圖明月未來風滿樹
夕陽猶在鳥無聲蘼蕪細雨山連郭翡翠斜陽
水滿川野色迎人過橋去春風吹面傷花行所
謂詩中有畫者非耶昔郭熙撰林泉高致具撫
唐人之句取可入畫者授人若翁之詩即此亦

圖之不
盡也

游張公洞

仙山不在高靈區設中葦包蒙自太古霹靂始開牖閭
然不耀地白日已通晝遂褻世游人我及千載後登頓
入地中足與石角闢飛崖臨紫雲既掀勢還覆仰面欲
成壓山鬼自司救元氣不蒸雨五色變乳溜支本萬不
齊纂纂纂簪筍瘦又如人披腹呈此琅玕秀苟靡表雲房
曲密通款實跬步必容炬老膽怯且逗神仙未易求冥

探亦何邁矯手采瑤華和飲千日酎聊度三十年擬與石同壽

七星檜

海虞七星檜宜為羣木冠列生老子宮與邑作奇觀廣
墀氣蕭森入門凜欲汗久信天地成沃知雨露灌傳植
從蕭梁其說我恐漫驗斗形巨全七既斃其半三株寔
聊存難執歲月算各各具一異形容匪詞翰西體裂多
橐豁然敞三判東體活亦裂筋骸互續斷北者蜷而禿

袖破舞脫腕葉亦不暇葉幹亦不暇幹左文皮索絢孤
葩頂留繖槎折象齒踈癭決鬼目爛疏越復叢穴散散
仍軒岸蛟孿及猊跛努力不得竄矛長及劒短接戰驚
楚漢如此紛怪駭聃君不能按知遭幾雷厄還屢兵火
難生死付冥然造物反被玩君子重貞固頑醜小人譎
緣高坐吹簫我欲呼鶴鶴從根覓薤丹澆泉覲紅燦長
生就其蔭永作婆婆伴

二月八日過靈殿祥公房

理舟指南郊迢迢及側景中塗止溪寺陶煙接村暝門
前見新月步步踏松影虛寮寂無風已有孤燭耿衲子
供爐香其意似有請草草成數行狂書亂斜整復作挂
猿枝墨瀟帶雲冷但記此經過流傳我何省

西山有虎行

西山人家傍山住唱歌采茶山上去下山日落仍唱歌
路黑林深無虎慮今年虎多令人憂遶山搏人茶不收
牆東小女膏血流村南老翁空髑髏官司射虎差弓手

自隱山家索雞酒明朝入城去報官虎畏相公今避走

古梅折枝歌

猾蛟不肯居西湖穹窿山中潛作都千年雜與草木處
土膏沁骨蒼皮麤雪中孥拳凍欲死腊乾又仗春風蘇
今年苦遭斤斧厄左股割落從樵夫幽靈暗泣天亦黑
十斛清淚含明珠抱材肯受爨下辱失勢豈分溝中污
韓湘直費百金買何啻網著青珊瑚挑回市上駭衆目
兒女爭看來喧呼還疑神物有變化白日閉戶防逃遁

金繩兩道鎖紐壯禁止更插碧玉壺主人尚恐莫長守
請我寫作流芳圖高堂雪壁照清影此屋此圖何可無
竹堂寺與李敬敷楊啓同觀梅

竹堂梅花一千樹晴雪塞門無入處秋官黃門兩詩客
珂馬西來為花駐老翁攜酒亦偶同花不留人人自住
滿身毛骨沁冰影嚼蕊含香各搜句酒酣塗紙作橫斜
筆下珠光濕春露明日重來花有無只愁此紙卷春去

題光福畫卷

羣山西奔駐湖尾通川夾山三十里川窮小瀝開鏡光
居民次水屋比比屋上有山屋下水開門波光眼如洗
虎山橋畔晚市忙打鼓漁郎賣鮮鯉霜前橘柚萬包黃
雨後楊梅千樹紫山園水抱開農桑樂土風光真畫裏
三年潢潦我無家恨不攜書亦居此

苦雨寄城中諸友

新雨似舊雨今年即去年只愁沈屋土失喜夢青天
頓頓黃齏甕家家白鷺田惟應五穀地改納水衡錢

溪亭小景

幽亭臨水稱冥棲
蓼渚莎坪只尺迷
山雨乍來茆溜細
谿雲欲墮竹梢低
檐頭故壘雌雄燕
籬脚秋蟲子母雞
此段風光小韋杜
可能無我一青藜

葛嶺

閒堂寶閣畫圖中
天乞湖山養相公
正是襄樊多事日
却將征戰試秋蟲

和吳匏菴姚氏園池

雨後春池漫石磯
櫻桃梅子兩爭肥
東風試放諸生假
閒就滄浪浣舊衣

題畫

四首

草房仍著薜蘿遮
地杓林深獨一家
只道春風吹不到
門前依舊有梅花

嫩黃楊柳未藏鴉
隔岸紅桃半著花
如此風光真入畫
自然吾亦愛吾家

楚江秋淨水沄沄
江上青山多白雲
手把蘋花却惆悵

無人作伴賽湘君

碧水丹山映杖藜
夕陽猶在小橋西
微吟不道驚溪鳥
飛入亂雲深處啼

白頭公畫

十日紅簾不上鉤
雨聲滴碎管絃樓
梨花將老春將去
愁白雙禽一夜頭

杏花

半抱春寒薄染煙
一梢斜露曲牆邊
東家小女貪妝裹

聽買新花破曉眠

客有餉河豚者畫雙玉圖酬之

有客來從海上村
早潮新喜得河豚
齊穿青篾一雙玉
侑我田家老瓦盆

越水圖

記別錢塘二十年
夕陽山色曉潮邊
隔江千里美人遠
夢落西興舊渡船

五柳莊圖

花開爛漫屬秋風滿地黃金醉眼中千古陶潛晉徵士
乾坤獨在此籬中

溪山落木圖

溪山落木正蕭蕭野客尋詩破寂寥一路夕陽秋色裏
不知吟到段家橋

史鑑二十首

鑑字明古吳江人有西村集

吳原博云明古詩不屑為近體冥搜

苦索直欲追魏晉而及之

詩話西邨才名亞於石田然以詩論刻意學古
似當勝沈一籌其述曾祖仲彬行狀止云推擇
為稅長先民質實不誣其祖若是其後致身錄
出始云授翰林院侍書浸假而直文淵閣矣浸
假而擢翰林院侍讀學士矣浸假而稱沒後建
文帝有御製文易名曰忠獻矣帝熟錢氏吳江
潘氏先後辨其妄近有司
祀于瞽宗此當考實者也

謨無猷邀飲於南虛室讀壁間馮明府詩有感

獨客困泥雨閉門愁索居天晴氣微和欲出嗟無興鄰
僧念孤寂招邀過精廬緒風泛林條溜水鳴階渠良友
四五人壺觴聊爾娛陶情非絲竹冥心遊古初為樂苦

不常奈此年歲徂一適非偶然且復少躊躇興懷舊遊
者由來心迹俱風波一分散判然區域殊精神莫與通
夢寐時交胥願言比浮雲隨風往微軀

韜光菴

韜光古精舍遠迹西山岑岡岫屢迴複雲嵐杳深沉流
泉激脩竹綠蘿被芳林密葉翳朝陽芳柯承夕陰杖策
遵微徑述將支遁尋行行未易即遙聞鐘磬音徙倚絕
塵想冥思諧道心寒芳詠招隱松風和悲吟

贈汝其通

江南有淑女婉孌美清揚芳馨振微風容華耀朝陽被
服鮮且麗不殊古姬姜蹇修來何遲幽獨處蘭房匪無
室家願夙以禮自防一朝君子求玉帛以時將御車盈
百兩道路宛生光和鳴合琴瑟宴衍吹笙簧顧茲待年
者後處諒無忘

飛來峰

久圖山澤遊苦為風雨款驚雷破重陰及晨光已顯透

迤入幽深厲揭度清淺靈山傳飛來合澗互回轉蘿垂
手可捫松高蓋恒偃陽厓丹霞凝陰洞蒼雪滿秀色如
可攬絕巘竟誰棧衆竅因風號羣芳遲春衍追念平生
歡厯厯猶在眼匪無新相知已少舊遊伴老僧久見招
相攜集閒館解衣任盤礴覽物適蕭散形忘慮則消情
至心莫展寄言同懷人對酒歌勿緩

落景村

羲和駕驟驥杳杳經天衢向夕迫崦嵫弭節少躊躇餘

光爛未收冉冉下桑榆歸雪樓遠岫暝煙生廢墟野雉
雉中林牛羊下城隅回風忽復來灌木吹笙竽野老耦
耕倦盥濯歸茅廬曳杖數雞豚引水灌畦蔬達人尚真
意寫圖聊自娛天機宛流動匪為形似拘

送劉德美之京

風吹大河水晝夜無停流嗟君萬里行且復須臾留王
命自有程安能顧朋儔執手兩茫茫日暮登行舟皇家
重賢才一藝成見收况茲衛生功妙與元化侔譬彼照

乘珠所性無不售叶願言進明德流光被中州

十八日登含虛閣

員景光漸闕海溢秋生潮禪林敞高閣勢欲凌雲霄老
僧敬遠客良夜相招要焚香足清供舉酒聊逍遙河漢
西南流微風忽刁調夜氣悄且清川原何寂寥悠然動
遐想凭闌發長謠商聲出金石餘音一何嘹願隨瑤臺
鶴高舉乘飄颻

支硎山人

幽人戀墳墓構此山澤居層巒代屏障積石當階除飛
泉漱瓊瑤靈籟鳴笙竽清音度回風頽響棲芳株入耳
盡成曲喈喈良不殊臨軒睇冥鴻坐石見游魚飛潛各
有適悠然忘所如緬懷放鶴人不得同交娛商聲滿天
地如與金石俱富貴非吾欲逍遙真有餘

送郭訓導

仲秋百卉腓旅雁思南翮涼風吹客衣嗟君事行役三
調不徙官依然在儒籍皇朝重文教此任故精擇諸生

得造就疑義資剖析入室與升堂煌煌盡珪璧冷熱固人情於君自無數浩歌菁莪篇芳塵滿瑶席

三天竺

浮屠善幻化利益誇羣愚未能空諸有亦復從其居魏
魏金銀宮湧出空山隅興廢固由人無乃法所驅眷茲
天竺名古來荒夏殊移之被此地欲表神靈區地勢既
形勝人情亦奔趨我來適閒曠二三同志俱登頓雖云
勞逍遙還足娛仰睇羣峰秀俯循流水迂微風動靈籟

滿耳聆笙竽徘徊日將暮浩然賦歸與

贈李中翰貞伯

層城多甲第朱門赫峩峩曲水起飛橋樓觀相陂陀何
人拊瑤琴獨坐當中阿朱絃激清商慷慨和悲歌回風
振叢薄游魚躍靈波大雅久不聞舉世尚淫哇知音既
云少笑者亦已多沉吟下階陞感歎將如何

題可菴老人寫竹

國初寫竹王舍人筆端生動妙入神風流太常繼其後

片紙一出人爭取可菴老人得此傳聲價在人尤赫然
江南賢豪動百數家家屏障生風烟前年寄我雪竹圖
天地黯慘雲糝糊大枝橫斜小枝亞金鞭擊折青珊瑚
今年寫竹吳江縣寫出千人萬人羨鸞鳳盤空雲日翻
蛟龍出海風雷變鷓鴣無聲錦瑟稀湘娥披雲未遮面
老人老人勿自珍筆力轉多方絕倫高山流水志有在
莫謂識曲無其人

過橫塘

西向橫塘過風涼天又晴兩山沿路轉一舸問津行野
水飛雲度斜陽去鳥明采蓮人不見遙聽唱歌聲

至通州

絕域經游少重關啓閉嚴官租兼救粟民業盡魚鹽海
氣朝成市潮聲夜入檐狼山渺何許空翠遠浮尖

冷泉亭口號與劉邦彥別

君去我獨留持杯勸君酒明日虎跑泉還來看山否

即景

綠樹原頭淺草青山谷口飛花記得南湖良夜月明曾
載琵琶

震澤竹枝詞送中書李舍人

太湖東與海相通大浪掀天難使蓬今夜且來洲裏宿
明朝又怕日高風

鴉鵲羣飛過別村烏雲接日晚昏昏西風一夜翻湖起
大小人家水到門

題靈隱祥禪師所寄扇

山月窺人色皎皎松風振瀑聲冷冷匡牀醉倚忽驚起
老僧時誦楞伽經

子昂蘭

國香零落佩纓空芳草青青合故宮誰道有人和淚寫託根
無地怨東風

朱近修云鄭所南畫蘭去土以宋亡土地非
所有也讀西村作則趙王孫蘭亦去土邪

趙同魯

四首

同魯字與哲長洲布衣有仙華集

王濟之云處
士身居田里

而喜論當世事見人之屈抑與民間利害時政
闕失憤然若迫於身年饑三上書巡撫三原王

公得減稅銀近歲論東南水患起於常熟之白茆港開白茆則水患衰堤崑山之沙湖則盜賊息而處士已言於數十年之前矣方時舉云先生宋宗室世家浦江仙華山下故以名其集不忘本也集中作音響和平意度閒遠無山林之枯瘠無藜藿之窮愁而閒時憂國之意恒寓焉及屢上當道書切切以東南賦重役繁為念視民之飢溺若迫于其體膚有不能自存者方之古人殆魯仲連之徒與陸子餘云先生詩文伉健質實不肯骯骯以諧世好

詩話成弘間布衣家居得言天下事如沈啓南讀楊宮詹守陞與屠尚書瀟論事劄子作為長篇而曰江湖眇吾憂其言不可終屠答詩云願言保遐壽待吾談始終未嘗以處士橫議藏怨蓄怨焉與哲三上王三原書極言吳中財賦之重三原賞其文欲薦於朝事雖不果而兩公之

虛懷可敬也。自宋景定四年春，三年買公田於浙西六郡，共田三百五十餘萬頃。所收者公租耳。迨元有天下，置江淮財賦都總管府，又立江浙財賦府，各領官田。籍沒田皆不在州縣原額。元史所紀大臣賜田，咸在平江等路。於時官田已多，及張士誠據吳所署平章太尉等官皆負貳。小人無不志在田宅，一時買獻之田遍於浙西。明初既入版圖，按其租籍沒入之已而富民沈萬三等又以事被籍沒，而浙西之官田愈多矣。官田之租多者，每畝輸倉米一石五斗少者七斗七升四合。本依租以徵稅，比租額而非糧額也。相沿既久，混租為糧，於是官民之田科則相遠，官田多者不勝其苦，而蘇松嘉湖四府尤其甚。其後蘇州之田賦則巡撫都御史陳某均之，湖州之田賦則知府劉天和、張鐸均之，嘉興之田賦則知府趙瀛均之。稽諸實錄，孝陵、獻陵、景

陵咸下減租之詔彼時尚分官民等則故然迨
平賦之後官田之重賦得輕在當日民非不以
為利然民田之輕賦反重在今日欲顯恩求減
則其藉已去無從依據此司國計者所當留意
也至於嘉興原止三縣宣德中析嘉興添設秀
水嘉善析海鹽添設平湖析崇德添設桐鄉嘉
興民田多故田則輕嘉善官田多故田則重秀
水則官民相等故在輕重之間趙氏圖記可證
善邑不原其本爭訟者幾百年不知非
附郭二縣之弊猶賈似道之貽害爾

平賦詩

有序

國家賦役之重莫逾江南在江南諸郡又莫蘇
松若也而賦額尤苦於不均或膏腴而反輕或

瘠薄而反重腴而輕者雖倍其入不過十稅其一瘠而重者稍加其耗則稅其三之二矣其始蓋由國初以田賜功臣之家及豪強兼并者私重其租厥後犯法沒入則視其租以徵稅甚至陂湖沙漲咸在焉且輕者多入富家而重者則歸細弱是以富益富貧益貧吳民世受其患實由於此矧洪武間轉漕道近且海運不廢故耗輕而民不甚病逮永樂中定都北方武臣憚道

之險疏裏河以通漕於是行資儻直咸出於民
始倍其耗故歲輸恒歉而逃亡相繼宣宗章皇
帝明燭是弊詔減官田三分之稅柄國者復寢
不行時蘇守況侯抗章上請得遵優旨又賴巡
撫尚書周公設水次倉以便輸納立對支易銀
諸法以省遠役故民頗蘇息而催徵易竣邇年
水旱薦臻疫癘時作餓莩接跡死亡相枕雖大
臣奉命屢加賑卹而瘡痍未瘳僻猶揚湯止沸

而不撤其薪投膠理濁而不浚其源未見其可
也乃去年秋御史中丞陳公奉勅巡撫京畿下
車之始首布均則之令俾當出耗者賦額輕則
倍之稍輕則半之而最重者則免焉參合分劑
多寡適均貧者獲甦富者知其至公亦無不悅
服田野阡陌間歡聲相屬不絕以為斯令也誠
得聞之於朝著為定制則我公之德將與皇明
之運同垂於無窮矣若是而頌聲不作非在下

者之責歟同魯跽伏草野親沐膏澤有不容嘿
者謹撰平賦詩一篇庸紀其實俾來者無忘焉
於赫皇明奄有萬方貢賦包篚罔不來王矧茲畿甸揚
州之野厥土塗泥厥田下下因地制賦初匪不均末流
敝剝輕重攸分或輕而腴或重而瘠富食其利貧罹其
厄宣皇憫焉明詔是頒十宥其三民用乂安逮乎週年
歲稔癘作老弱纍纍填溝委壑事既上聞屢下優詔亟
命大臣撫綏慰勞賑之雖至民則未甦繼命我公我公

曰吁盍澄其源盍正其本不釐爾賦曷救爾寤輕重參
停各盡其情如鑑之公如衡之平若解倒懸若拯焚溺
謳歌鼓舞道路充斥譬彼雪壑釋然春融誰其致之實
惟我公何以報之願公受祉毋久賢勞歸相天子天子
元首我公股肱一德交孚福我蒼生野人作頌敢告太
史祝我皇朝億千萬紀

感遇 三首

吾慕魯連子飄飄遺世氛英風振八極高懷薄層雲寧

甘蹈東海肯仕非其君若人儼猶在百世疇能羣

君子重名教小人倖奇功嗟哉樂羊子食子思徇忠沛
公誠何心忍令烹若翁父子恩既薄君臣義始終

歲華既云晏心事成蹉跎窮達固有命卷舒如我何抗
志磻溪釣紆情草野禾鴻飛日冥冥不復憂虞羅

姚丞二首

丞字存道號畸艇長洲人弘治中貢生有集虛

齋橐

詩話存道為文毅公布孟高祖吳尚書一鵬婦
翁也友於楊君謙王濟之與沈啓南酬和尤數
吟詠之暇不廢詠諧鄉人周宗道者修髯而泉
橋趙鳴玉無鬚存道講於周分十鬚予趙啓南
為草募疏云伏以念天閭之有刺憫地角之不
毛雖傳相莫逃於禿名賴易貢尚存乎飭義為
人者康樂捨施有迹為已者鶴謚插種有方故
小子十莖之敢分宣先生一毛之不拔推其餘
以補也宗道廣及物之心乞諸鄰而與之存道
獲成人之美使離離緣坡而訖我當楫楫擊地
以拜君把鏡生歡頓覺風標之異臨流照影便
堪相貌之全未容輕拂於流羹豈敢易撚於覓
句感矣荷矣珍之重之一時傳以為笑斯亦風
人善謔之道也存道詩未發雕流傳遂寡孝廉
田修出家藏本
錄其近體二首

題畫

白鴈啼荒渚蒼涼露未收潮聲驚野客曙色動孤舟
霜葉如花好溪雲似水流無端鄉思切一上海邊樓

過宋故宫次沈啓南韻

廢苑秋深草樹微湖山湖水少光輝不應河北頒師急
却使江南報捷稀行殿聲沉環珮玉寢宮香冷綺羅衣
空教過客增惆悵搔首無言對落暉

崔澂 三首

徵字淵甫吳江人國子監生有傳響集

楊君謙云淵甫

既升太學即絕意仕進一工於詩不啻飢渴之於飲食也亡何而白玉樓召命至矣惋歎如何

顧華玉云誦淵甫詩如坐雲巖霧窟與絕粒老禪焚香啜茗悠然有餘味蔡九遠云先生

詩步盛唐格律氣味絕相似顧行之云傳響集詩溫亮雅緻琅琅若振玉可以並古作者

詩話淵甫年未三十而大當其存日楊君謙吳原博李貞伯都元敬沈啓南周伯器史明古諸君子皆與訂忘年之交原博尤重之呼為崔小先生云集中和唐詩多至三百七十餘首恪守唐人矩矱而未成變化使假之年當不止是此諸君重為悼惜也

春江送別

金史紀事本末 卷三十
頭白猶為客辭家是幾年
離筵臨野水歸路入江煙
鳥度青山外帆開暮雨前
春波與春草悵望一淒然

渡口

落日滄波闊西風木葉稀
沙頭人語雜煙際櫓聲微
燈火誰家起漁樵幾處歸
臨歧笑揚子何事淚霑衣

偶題

行舟小住更聽歌江上東風吹綠波
折取桃華贈離別却憐春色已無多

程慶琬 一首

慶琬字廷殷休寧人

王仲房云廷殷早游吳門與吳原博沈啓南楊君謙

黃勉之友善晚集國朝詩二百餘家止於弘治雖搜密東南米遺西北亦可留資後評有功藝

苑矣

入垓口

沙明水碧淨無泥
三百灘盤上歛溪
兩岸青山春欲暮
棟花飛盡竹雞啼

史忠 一首

忠字端本一字廷直上元人

周吉父云癡翁詩寫自己胸次不以

鍛鍊為工盛仲交合金元王之詩編為江南二隱橐

詩話廷直自號癡翁近治城建樓題曰卧癡楊君謙為作記翁畫山水人物花木竹石皆工嘗

訪沈啓南於吳門不值見堂中燈有素絹搢筆作山水不題姓名而去啓南歸見之曰吳中無

此人必金陵史癡也邀之回留三月乃返翁妻樂清道人朱妾白雲道人何玉仙玉仙亦善畫

工篆書知音律翁教以琵琶每自製曲命玉仙被之絃索晚無嗣一女既笄婿貧不能娶與婿

期元夜略具隻雞斗酒我當過飲至元夜詎其妻女曰家家走橋觀燈盍亦隨俗可乎攜妻與

女送至婿家留其女一笑而別即是而觀翁正未嘗癡也二隱橐流傳絕少題畫一絕乃仿小

米雲山書法頗豪縱曾
觀於休寧吳璵于庭宅

題畫

雲光辣闌樹模糊略約芭籬路有無曾對南徐江上雨
會心只有米於菟

倪復一首

復字汝新鄞縣人有畏齋橐

江行

野水田田綠江邨曲曲斜獨行尋不厭坐占白鷗沙

雷 鯉 一首

鯉號半窗建安人

汪良迪云半窗詩沖
雅清婉曲盡物情

題畫

怪石窗前墮流雲
竹外斜薜門斜照裏
一徑入黃花

張 鈇 二首

鈇字子威慈谿人有碧溪集

淮陽夜月

今夜淮陽月清光似故鄉
有人千里外對月望淮陽

湖上竹枝詞

門前湖水白茫茫望盡烟波不見郎
彷彿聞郎歌水調
鴛鴦飛起藕花塘

黃雲十一首

雲字應龍崑山人由歲貢生任瑞州府學訓導

有丹巖集

朱士光云先生長篇短詠馳騁古今其氣溫然而粹其旨穆然而遠

詩話丹巖懷才不遇嘗渡清淮盡以文橐投之水晚就一壇苜蓿之盤不飽賦闕食詩云妻子恒苦飢生事轉踈拙矧茲秋收時吾室瓶儲闕名微賤賣文所得亦易竭又絕糧詩云今朝斷

晨炊家人盡僵卧天陰動寒氣鳴屋霰交隨入市糴脫粟薄糜聊拯餓可謂窮矣詩雖未純然
勝林屋
十倍

游焦山

昔年過焦門風帆徑飛度老矣遂此遊清絕快平素僧
堂列古鼎款識成周鑄秀疊水墨屏晴披濃綠樹石壁
舊題名苔蝕若簡蠹仰止三詔洞而以焦君故瘞鶴下
勒銘水落偶一露大江亭呼吸高雲岫吞吐絕頂御冷
風千里可指顧縱目窮扶桑出日蒙海霧俯仰歎今昔

往來走烏兔大哉神禹功明德詎能賦

重修瑞州學石隄工人沒水得古石鯨

類宮臨清江下瞰百餘尺水激岸善崩雷闕走羣石不
知古石鯨何年此窟宅掀置水之滙其勢欲跳擲依然
鱗甲動水苔滋冷碧得非昆池來遂與牛女隔中宵寂
無音桐魚庶可擊

鄱陽阻風

歲暮多北風無那歸舟逆一樣茅葦洲濤聲駭湍澗

深蟄蛟龍雪舞浪花白船聚即有鄰細語向旅夕賴作
寇盜防憂虞亦稍釋垂暮嘗險難嗟哉為貧迫古有高
世流寧為此行役

白溝次東之韻

西山鬱高寒青繞燕代關我行春已深絮纈尚未脫平
生四方志眼底纔主撮區區白溝河編簡不能剗經洑
流漸廣赴海傾莫遏欲渡仍徘徊緬懷開運末茲惟遼
晉疆終古抱嗟咄天公憤餘腥飛雨夜來潑堂堂十六

州幅員一朝割桑君漫周旋國旱爾為魁中原殺戮盡
豈忍狼夫拈哀哉黃龍府回首飯無盃橫流到靖康戎
馬屢南跋往事勿具陳憂端猝難豁居人諱言兵惟記
黏與曷

煙江疊嶂圖為陳推官賦

趙家駙馬王晉卿畫筆直與造化爭寶繪堂開品神妙
煙江疊嶂新圖成東坡老人發天趣樹搖江色春空晴
武昌樊口五年住楚澤放臣同濯纓後來烏臺入詩案

嬌紅泣露啼春鶯

自注轉春鶯晉卿家姬晉卿與東坡同謫姬流落人間

兩翁富

貴春夢破寓意奚啻鴻毛輕後來吳興王孫規模亦神

似終遜舊本尤精英陳侯出佐山水郡桁楊畫卧莓苔

生挂之高齋一丈壁彷彿坐聽秋泉聲陳侯慎勿卷還

櫝或恐飛去難為情

寄沈石田求畫

五日十日畫山水經旬亦可成一幅我求君畫故作難

三四年過將五六人來莫怪數附書譬諸熊掌吾所欲

擬乘艇子促迫之又恐收書到城隍題詩再拜致執事
煩君開緘一寓目忽焉為我發新興湖上草堂風滿竹
三茅二華入手筆崢嶸之頂空洞腹經營意匠忽貌成
爛逸天真洗凡俗厚予之嗜亦多矣豈止三月不知肉
若令烏有先生來只向江山寄遐矚

施彥清野翁莊次沈啓南先生韻

笑王給事鎖西莊隔水通人故架梁載酒柴門無吠犬
分花鄰舍恰低牆書臨晉帖時數過詩詠豳風日幾章

好鱸魚飯香稻縱饒飛雪興難妨

風雨

風雨暗江天邊江夜泊船寒燈對兒女歸路逼殘年

題畫

曾躡匡廬五老峰連山雲氣擁長松而今看畫渾相似
夢斷開先寺裏鐘

雨止

滯雨無聊待雨晴依然飽飯聽松聲西風短檣明朝發

一路看山直到城

蕭齋

三月琴川四月還虞山佳處儘躋攀曾於拂水巖頭望
一塔煙中認玉山

莫止

四首

止字如山無錫人有南沙集

俞汝成云南沙與邵文莊相友善故

其詩格律音韻亦相似周青士云南沙亦有佳句如云天闊一聲何處雁江平千里獨歸舟

新添十竹皆紫玉恰對九峰如畫屏松塢風高聞落子菊籬秋晚愛餘花皆脩然拔俗也

鴨城懷古

養鴨鴨可馴養兵兵可彊只有方寸心多愁難自防千
年古城已復隍但見牧豎驅牛羊姑蘇之臺近相望二
十三君在何許開吳祖德誰繼將玩人玩物皆喪亡喪
亡豈獨由禽荒嗚呼古今即事感慨長酒酣日落天蒼
茫

正月十九日漫述

節名燕九尚留燈故事元從闕下增時態盡隨前夜月

餘光猶照幾家棚
臘醅熟久樽初剖
園韭香新饌可登
細雨落梅清詠徹
高情應念昔人曾

昭君曲

但使邊塵淨
蛾眉敢愛身
千年青冢在
猶是漢宮春

成化乙未仲冬書事

病眼經旬只掩書
蕭蕭梧竹自村墟
忽然驚喜開門出
天子今朝已建儲

周紹亞一首

紹亞吉水人成化初內黃訓導

朱仙鎮岳王祠

南渡擎天一柱摧塵沙滿眼實堪哀
金戈北伐心何壯鐵馬南還志已灰
雁字傳哀天外去河聲流恨月中來
我今謁廟瞻遺像痛挹椒漿奠一杯

鄭延

三首

延字世昌海鹽人成化中以貢授廣東市舶提舉有東谷存笥集

雨中次彥超韻

對雨愁無那時局
白板扉驚看塵鬢
改坐使壯心遠有
客傳檣素何人問
布衣思君不得見
心逐白雲飛

懷劉隱居

隱君家住秦溪上
茅屋蕭然掩薜蘿
記得春風曾有約
扁舟載酒一經過

題畫梅

羅浮山頭孤月明
碧天澹澹參星橫
玉人歌舞萬籟歇

樹杪翠羽飛有聲

陸堇一首

堇燕人

贈別秉智

沈啓南甥

已富三冬學青衫稱少年遠尋東老寓獨羨外甥賢雪
變寒江雨鐘鳴野寺天又驅羸馬去離思遶長川

羅燾三首

燾字元溥上元人由歲貢生授光澤主簿有淵

泉集

宿黃龍觀

杖藜迢遞尋仙源古祠遙見雲中幡
空林山猿食果響深澤野獺銜魚喧
道人步出懸厓下度竹穿松遠相訝
焚香邀入紫芝居為寫黃庭坐清夜

野興

山中雨欲來樹杪風先起猶有試茶人
偶坐松蘿裏

贈愛山上人

古寺高僧意自閒
虛堂新構翠微間
白雲綠樹遙相映
愛看當窗雨後山

錢百川

三首

百川字東之無錫人有寒齋狂豪

俞汝成云東之少年學琵琶

半日度四十曲人以為神解
詞賦多不傳晚宗陳白沙氏

詩話東之絕句小詩頗類崔國輔晚師陳莊遂
為學究體其觀石田集詩云宋周程張朱道大
言莫比迄今五百年惟陳白沙氏未免頽然自
放矣句如持竿坐惜籬邊水仰面貪看屋上山
淺碧杯中歌落日亂紅堆
裏宿殘霞想猶少年作也

江南曲 三首

采蓮復采蓮，采采不捐手。
貪摘雙頭花，拔斷連理藕。
湖南采蓮花，湖北采蓮葉。
回頭見郎來，低頭理雙楫。
小姑未成人，不慣見郎君。
蕩舟入新荷，牽壞紫羅裙。
乞食

陌上桑重綠，門前麥已黃。
逢人話豐稔，乞食尚無方。
寄中甫上舍

淮清樓畔花白下，橋邊酒醉殺少年兒。
借問君知否

葉聰四首

聰字文明永嘉人以子式貴贈翰林編修有九

斗山人集

呂梁洪

西風將客權飛度呂梁洪地迴雲垂野天低雪滿蓬山
從豐沛下水向泗淮通疏鑿誠非易懷哉大禹功

秋懷

北斗城高近海濤每懷風景動微吟青山有恨傷甌越

流水無情自古今幾處吹砧空夜月誰家擣練急寒砧
天涯此日重回首忽見江花思不禁

舟次瓜洲

瓜步南頭水拍天高樓獨望思悠然半江僧下山腰寺
兩岸人分渡口船萬斛千艘非舊日一龍五馬是何年
邇來欲趁風濤便十幅蒲帆向浙川

舟中新涼有感

畫舸西風日夜清新涼已覺葛衣輕去家千里又千里

望闕一程還一程露浥芙蓉宜曉色月明蟋蟀盡秋聲
積思宋玉悲何限可是忘歸愛遠行

張

承

一首

承安陽人山東教官

詩話張君為崔後渠門
人客至一詩意甚蕭遠

客至

茅屋兩三間草草蔽風雨客來不入門坐愛千年樹

陳

蒙

一首

蒙字允德常熟人有汎雪集

宿遷

古邑臨河水昏鴉噪縣門連橋爭集市三戶自成村
黍秋風隴牛羊落日原客愁千萬種辛苦向誰論

戴冠一首

冠字章甫長洲人以貢授紹興府學訓導有濯
纓子集

題姚少師畫竹即次其韻

北地風高卷塞雲驚沙吹起鴈成羣客邊偶寫龍孫譜

忘却江南有此君

王湛求云風人善戲之遺

方太古

四首

太古字元素蘭谿人有寒溪子集

詩話布衣初受經於楓山中年棄去專力於詩
不苟隨時尚句如老松萬樹霽深雪流水一溪
浮落花白布探囊無長物烏皮几笑貧居平
田白洳流新雨絕壁青楓挂斷雲朝看煙雲如
畫裏夜聞風雨似湖生多情夜雨馬蘭草無限
春風鶯粟花雲洞草香初過雨月臺松老不知
年頗近江西詩派
蓋特立之士也

山中

山中歲云暮，抱膝惟長吟。
北風吹蓬藿，悲響懸高林。
仰視浮雲翔，白日不為陰。
昔我三春花，今日不可簪。
昔我洛浦錦，今日不可衾。
孤鴻逐黃鵠，石上鳴瑤琴。
瑤琴絃朱絲，一操論千金。
真音不諧俗，聊以明吾心。

寒食思友小酌

已買桐江舊釣船，清江白石趁鷗眠。
風前轉眼逢寒食，時事驚心豈少年。
故國梨花千樹雪，小堂楊柳一林煙。

夜來有夢高陽侶
覓得村沽飲十千

書寒溪書屋壁

屋占桑麻半畝園
歲無車馬與人喧
午涼樹影圓浮地
夜靜灘聲直到門
萬卷詩書銷日月
一灣鷗鷺共朝昏
興來蓑笠扁舟去
不亞浣花溪上村

穀雨

春事闌珊酒病瘳
山家穀雨早茶收
花前細細風雙蝶
林外時時雨一鳩
碧海丹丘無鶴駕
綠蓑青笠有漁舟

塵埃漫笑浮生夢峴首於今試薄遊

程玄輔

一首

玄輔字叔明歙人有龍谷老人集

雪後次吳江

北風吹短日孤櫂倚松陵城郭留殘雪江流走斷冰
新詩歌自慰好夢笑無憑故舊吳山下山陰興欲乘

金

琮

一首

琮字元玉上元人自號赤松山農

送別史癡翁分得塵字

酌酒題詩送故人，卧癡樓上宴殘春。
誰能老去身無事，我媿年來鬢似銀。
楊柳風輕渾是夢，杏花雨細欲成塵。
行裝賸有金壺墨，處處湖山為寫真。

吳

鏞一首

鏞字希聲，歙人有月溪集。

秋晚

風高野水寒天遠，青山小渡口人不來。
斜陽送歸鳥，陳達

甫云絕
似右丞

沈本初二首

本初字大中崑山人有婁曲山人集

周子顯云
大中詩沖

澹和平老
而彌篤

嘯臺晚眺

高臺凌日暮幽懷一何閒
凭闌縱遐眺員嶠如可攀
雙鳬下澄沼一鳥鳴花間
欣欣物意榮寧知光景遷
倚劒白雲中賦詩蒼厓巔
飄然拂衣起采菊歌南山

送周山人南

東風晴日送餘寒
野色山光恣客看
立馬春亭勸君酒
醉君容易別君難

朱曜一首

曜字叔暘松江華亭人以鄉貢仕為鹽課提舉

後以子豹貴封御史有玉洲集

唐開元詩肆筆沛然若

不經意然有味外之味他人句鍛月鍊或不及也
錢武子云封君詩取自娛不事敦琢然如

翠竹呼鳩婦青禽長稻
孫不可謂非佳句也

喜雨

一犁春雨潤新田
小犢還宮老牯眠
笑摘園蔬澆村釀
夜燈兒女說豐年

秦

顛

二首

爽字仲孚無錫人夔之弟有滌煩亭豪

趙元默云昔人

許詩謂有詩中畫有畫中詩集中如杖藜扶我溪橋步有盡湖南十里山則詩中畫也微風輕颺茶煙起知有人家在水西則畫中詩也

詩話仲孚為修敬封公季子封公暴中心痛仲孚刺血於胸和酒飲之母殷恭人膝傷吮之而

愈郡縣上其事詔旌其門曰孝子秦陵即昨賜
以冠帶嘗作溪山清興堂清遠閣結亭於後園
顏曰滌煩九日詩云抱病忽聞佳節至獨攜藜
杖強登臨黃花笑我容還瘦緜酒盈尊手自斟
處處辭巢知社燕家家悲杵送秋音不堪覽鏡
頭如雪折得好枝嬾去簪次日得疾不起其詩
較父兄別裁體格頗有清疎之氣

溪橋散步

老去觀書興易闌綠陰清晝況多閒杖藜扶我溪橋步

看盡湖南十里山

龔行儉以扇索画

行過溪橋日欲低
綠陰滿地郭公啼
微風輕颺茶烟起
知有人家在水西

周立一首

立字公禮長洲人

將過江陰訪朱善繼蓬中風雨乃回

尋君無那朔風顛
興盡空回訪戴船
洶湧浪喧欹岸石
冥濛雨濕遠林煙
江楓葉落紅銷樹
野水冰生白滿田
歲晚幽期嗟竟阻
相過重擬入新年

董雲四首

雲字復宗海鹽人有從吾道人詩藁

詩話蘇石間陽明講學瓢笠渡江從之年六十
有八年長於陽明云明年從其師越中守歲風
雪夜賦詩所云六十九年今夜除者是也陽明
和韻云況有故人十里至不知今夜一年除復
為序其事云道人今年已七十往來湖山之間
去住蕭然曾不知有家室其子穀賢而孝謂道
人老矣出輒長跪請留道人笑曰爾之愛我也
以姑息吾方友天下善士以與古聖賢為徒天
地且逆旅奚必一畝之宮而後為吾舍耶集有
山居吟云青山遶湖茅結廬飢餐渴飲事無餘
是非欲付樵與漁
洵達者之言也

天竺次白樂天

松林行盡見松門
花事三分過二分
高樹鳥呼低樹鳥
入山雲笑出山雲
峰前瀑布僧前落
竹裏流鶯寺裏聞
忙處不知閒處好
紅塵白浪正紛紛

次沈紫峽病起

白賁坊中矮沈家
小山池館足烟霞
春回病骨三年艾
門掩青湖獨樹花
詩草也堪書酒券
釣竿長是拂田車
客來更覺山翁健
一笑窺園出絳紗

醉漁

石佛寺前江繞門
柳姑祠下花連村
何人得似漁郎醉
白日青天枕瓦盆

月夜舟行

野鷗抱夢棲烟渚
山月隨舟過水村
猶有打魚人未睡
共聽更鼓到城門

薛章憲一首

章憲字堯卿江陰人有浮休居士集

趵突泉

感沸趵突泉發源自王屋
泱流溢為榮迤邐陶丘北
黃山渴馬厓入地乃更伏
潛行五十里突爾出平陸
曾不舍晝夜東匯成川澳
乍似滄浪水浴出三白鵠
更疑清泠淵白龍服魚服
蒲荷相蔽虧鳧藻舞濡淶
踟不忍去奈此白日速

魏倂二首

倂字達卿鄆縣人官石城訓導有雲松詩略

李果

堂云雲松詩略歐陽鵬所選於三十餘
首中止錄三百四首所遺必多佳者

題歸隱圖

若有人兮遐方辟荔衣兮荷裳餐三芝兮五藥蹇幽獨
兮茅堂春日兮遲遲春風兮微微鳴鳥兮喈喈垂楊兮
依依覽佳辰兮何求沛我行兮蘭舟時不可以苟得邈
予懷兮中洲雲冥冥兮欲雨掇芳菲兮歸處羌蹇修兮
未來聊舒遲兮容與

十八灘歌

水中亂石立森森急溜盤迴一派深山鳥任呼行不得
舟行自古到如今

史

徐一首

徐字巽伯深陽人都指揮有樂山集

宮詞

玉樹花枝過雨稀不堪減却小腰圖朝來陡覺香羅薄
還著團金舊賜衣

朱

訥一首

訥字存仁寶應人成化丁酉舉于鄉選知郅縣
調長陽以子應登貴封郎中

題畫

空翠明遠林夕陽澹紅樹茅屋倚深溪漁舟日來去

楊中一首

中字致行無錫人有簡齋集

題畫

素衣緇盡鬢絲蓬兩脚東華踏軟紅何似儂家江水闊

醉眠春雨釣船中

胡尚志

一首

尚志字士先績溪人有海陽集

雜詠

秦越隔千里坦坦皆夷塗苟贏旬日糧真可造其區彼
昏自狂悖舍夷繇徑趨野徑多岨嶮况復迷方隅窮年
不能達力倦空踟躕徒使旁觀人咄咄長嗟吁

朱

朴

十五首

朴字元素海鹽布衣有西村集

苦哉行

年荒莫蠲糧蠲糧民益荒歲歉莫賑濟賑濟民益傷虛
名及小戶米入官家倉僅為公門需那能充飢腸苦哉
復苦哉淫雨天降殃但聞流水聲不見白日光菜甲短
棲畝麥苗已委黃濕薪及爛齧其價十倍強二月春已
半桃李無豔陽出門泥淖深況復多虎狼苦哉難重陳
淚下霑衣裳

山中懷遠人

空山闌寂兮無人麋鹿猿狖兮成羣風瑟瑟兮自起泉
滴滴兮相聞晨光發兮出日夕色暝兮歸雲獨怡悵兮
登陟眇予懷兮思君

秋夜吟

風披披露淒淒草蟲互相語林鳥無定棲人來不來闌
塞隔月出未出天河低誰家屋頭烏夜啼

寒食行

寒食清明天氣晴家家上墳齊出城小家叢冢不栽樹
雖有紙錢無挂處大家新墳松柏多羅城石柱高嵯峨
兒孫跪拜女婦笑杜鵑啼血黃鸝歌誰家古墳生荒草
滿地落花人不埽當時從葬極殯華碑碣猶書鳳鸞誥
鑿地聚土作玄宮術人指點來三公三公不來術人去
只有石獸嘶秋風子孫流落無可奈翻道此墳風水害
又疑棺槨有金銀掘作平田向人賣嗚呼世間萬事空
紛紜貴賤變化皆浮雲生前但有一杯酒身後何須三

尺墳

細腰蜂為羣兒所傷有感而作

螺贏螺贏草下青蟲銜一箇飛去飛來遶戶庭嗚嗚有
聲祝類我孩兒害物何不仁驅逐頓令巢穴破當時遠
計為兒孫遠計無憑近成禍因之令人三歎息黃蜂采
花勞羽翼辛苦功成不得食割作它人口中蜜春風三
月桃李時不如就使花狼籍

靈隱寺

合澗橋頭水飛來洞口山鳥盤蒼壁影僧掩翠微關松
露晝還滴巖花秋更斑一年嘗一到一到一忘還

吳江道中

江上芙蓉晚著花故人書画汎輕艖廿年往事今重省
雙鬢逢秋各有華水落湖田漁網集天低澤國鴈行斜
垂虹橋下堪停櫂碧樹紅簾賣酒家

楚江秋曉

卧聞津吏數江程白鳥青莎岸岸明秋色遠連溫浦樹

人家多繞漢陽城殘燈野寺鐘初動瘦馬河橋客早行
三國廢興何處問荻花風起又潮生

贈張惟愛秀才

有美人兮山之陰我欲放舟何處尋幾時射策蓬萊殿
猶自讀書松桂林神交千里夢已接詩社百年情獨深
芙蓉可折不可寄江水浩浩傷人心

以畫寄雲林

朝望南山雲暮望南山雲雲山朝暮望一望一思君

董兩湖扇圖

南湖春水平北湖春草綠中有蕩舟人解唱滄浪曲

夕

出門望南山日夕山光冷山月出未高棲鴉動林影

西湖竹枝詞

二首

阿儂家住湖水傍
菰米萼絲野飯香
貓頭紫笋尺圍大
沙角紅菱三寸長

郎從湖上打魚鰕
妾在湖邊只浣紗
生長不離湖水上

湧金門外是儂家

題水仙花

碧池妝鏡曉寒消不染鉛華意自嬌
惱殺江南趙公子
却將金粉浣生綃

謝復一首

復字一陽歙人布衣有西山橐

春日偶成

二月春光好村村景物賒
綠垂煙外柳紅綻雨中花
倚

杖登危嶠提壺坐淺沙耦耕今有伴隨處可為家

表仁二首

仁字良貴吳縣人有一螺集


漫興

不干榮祿息危機茅屋三間老布衣多少長安騎馬客
故鄉深院鎖重扉

暮春有懷

花老辛夷萬綠肥草香江岸燕低飛故人竟負看春約

回首東風事已非



明詩綜卷三十

欽定四庫全書

集部

明詩綜卷三十一至三

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷三十一

翰林院檢討朱彞尊編

錢福一首

福字與謙松江華亭人弘治庚戌賜進士第一

官翰林修撰有鶴灘集

靜志居詩話鶴灘吟情以捷敏勝故自解春雨
後凡俚詞儷句動輒歸之此選家皆棄不錄也
喬希大志其墓曰與謙卒年纔四十有四予與
與謙同游遂菴西涯二先生之門與謙嘗言作

文須昌其氣先使一篇機軸定于胸中然後下筆當沛然莫禦矣又言辭必根據道理雖恒言近事亦不可略然則鶴灘亦不專以捷敏勝人所傳俚詞儷句亦未必皆出其手也

少年行

荻芽新長河豚肥
吳姬作羹俊味稀
金陵子弟快一飽
挾彈走馬穿花歸

靳貴一首

貴字充道丹徒人
弘治庚戌賜進士第三累官
太子太保戶部尚書兼武英殿大學士贈太傅

謚文僖有戒菴集

詩話文僖康陵舊學南巡時臨其喪命詞臣撰祭文皆不稱旨御製一首云朕居東宮先生為傳朕登大寶先生為輔朕今南游先生已矣嗚呼哀哉代言者歎息歛手晉江何氏輯明文徵以此壓卷焉

碧渠為李宗朝賦

白雲深處有山莊分得清渠入小塘水面雨翻菱葉亂
門前風過稻花香竹牀不作勞生夢石硯惟鈔種樹方
樵子是兄漁是弟卜鄰何計得連牆

周澤一首

澤字天雨嘉善人弘治庚戌進士官贛州同知

梅花道人墓

古墓牆陰卧斷碑白楊高樹叫寒鴟
閒雲終日自來去
不見梅花老畫師

方良節一首

良節字介卿莆田人弘治庚戌進士官至布政

使有雪筠集

題李在畫

烟霏壓翠萬峰低
樹樹陰濃路轉迷
何處人家春不管
落花流出小橋西

楊旦一首

旦字晉叔建安人弘治庚戌進士授吏部主事
累官南京吏部尚書有惜陰小豪

小圃即事

池館圍春曲徑通
虛檐掩映綠陰中
入門頓覺風光別

幾樹桃花隔竹紅

祝允明 六首

允明字希哲長洲人弘治壬子舉人除興寧知縣遷應天府通判有祝氏集略又有金縷醉紅

窺簾暢哉擲果拂絃王期等集

顧華玉云希哲玩世自放憚近

禮法之儒學務師古吐辭命意迴絕俗界效齊梁月露之體高者凌徐庾下亦不失皮陸

子餘云先生貫綜羣籍裨官雜家幽遐蒐璫之言皆入記覽發為詩文橫縱開闔茹古今無

所不有王元美云祝希哲如盲賈人張肆頗有珍玩位置總雜不堪

詩話六如居士畫枝指生書允稱絕品至于詩
遜昌穀三十萼然如莫食汨羅魚腸中有靈均
小山侵竹尾細水護松根麥響家家碓茶提處
處篳人家低似岸湖水遠于天置之歎歎集中
正自
難辨

和陶飲酒 二首

大道本一致無間寂與喧每有希夷時不見耳目偏迹
水喜東流浮雲忘故山美人隔秋風涉江恥空還旦暮
或遇之莊周有遺言

吾足如轉蓬遇風無停時節候迭代序常與家室辭三

金匱要略卷三十一
歲凡五出別離復在茲行止豈有津誰為我稽疑不若
巢中禽乃免霜霰欺天運實為爾通塞任所之

愍農

大麥青青四尺長大水過頭一尺強安得不託與餒餒
無餒餒且自可秧不成苦殺我

漢闕

漢闕咸陽建山河百二開甘泉芝草出天馬大宛來宣
室宵衣問長楊獻賦回寧知天祿閣不用子雲才

廣州贈龍鴻臚

吉水龍夫子論交歲月長
屢銜天子詔三使日南王
欲餽舟無寶留題豪有囊
一杯海濱館遠意共茫茫

題畫

柳風吹水細生鱗
山色浮空澹抹銀
總道江南風景好
從前都讓畧泥人

何孟春二首

孟春字子元彬州人
弘治癸丑進士除兵部主

事歷郎中出補河南參政入為太僕卿以僉都御史巡撫雲南召為吏部右侍郎以議大禮泣諫左遷南工部右侍郎尋削籍卒謚文簡有燕

泉先生集

送王伯安南都審刑

秋雨彌天來秋風動地發秋官方用權暑氣埽七月四壯復何之時當奉天罰黃紙下青冥欽哉惟帝曰罪毋脫秦黥法勿加楚刑三覆五覆間務使事情核宸衷一

寸丹載拜書之笏年來民俗漓肯長其告訐年來吏事
冗肯聽其唐突持此直如絃何人行請謁持此平如衡
何人得乾沒莫將五德鳳擬以獨擊鵲筆端有造化還
解肉冤骨山川幾經歷歲月去飄忽簿書盈几席肯作
塵勞咄夜分燈火孤清興諒難汨檢點紀行篇浮踪遍
吳越歸朝擬何時欲及衆芳歇民物哀矜餘轉覺心如
甑好為萬言書伏奏蒼龍闕

洮岷道中

景色來西徼蕭條信遠方水分羗部落山絕漢封疆幾
處青稞熟深憂白雨傷荒城誰為守十室九逋亡

顧清十八首

清字士廉松江華亭人弘治癸丑進士改庶吉
士授編修進侍讀忤劉瑾調南京車駕員外郎
瑾誅還侍讀進少詹事引歸為南禮部侍郎進

本部尚書致仕謚文僖有東江集

孫貞父云文僖吟詠篇章

有閩民
情世用

詩話東江詩法西涯觀其險韻再四疊用足見其能事當日諸公受長沙衣鉢或推方石或稱二泉或首熊峯以鄙見衡之要皆不敵也

七月十六日鄉人會餞兩新令于寓舍書所感成
三十四韻

吾邦古壯縣馳望自宋唐勝國登使府因之啓上洋官

曹雖日崇阡陌仍故疆宋季已窮蹙取民猶甚涼報省稅十

一萬貫實徵八萬納止三萬餘一壞賈綿州再困朱管張賈買公田加賦後籍沒朱

國珍管明朱清張瑄名田按租起稅浸淫到國初乃至十倍強兩稅共一百四十萬

浮名累仁政有識空歎傷宣祖痛裁損經綸更文襄民
力旣已紓賦入乃有常公家無闕事帑廩有餘藏後來

諸君子率由如舊章至今鄉父老稽首周侍郎

周文襄以侍郎

巡撫後升尚書而民止呼其故官

粵從近歲來智者好紛更或云時世

異古法今難行或云廣儲積典守為民殃墉坊一以決
狐鼠恣披攘但見私稅增不聞公廩穰已已及庚午諸
倉惟棟梁苟能實蠲稅猶或幸小康功名掩慈惠白紙
裁青桑都将烟水區拍作木杏場一字挂經費年年理

逋亡從此遂困弊蕭然類窮鄉去夏復霖雨湖田盡滄
浪監司不肯奏郡邑徙蒼皇荒租二十萬積雪傳嚴霜
君子清廟器牛刀試新芒顧此凋瘵餘宜爾勞運量立
國自有本為政自有綱不聞慈母子飢寒啼路傍往迹
既非遠後賢慰相望區區閔人窮寢食熱中腸願見德
化成聯飛八明光還將鏤青管濃筆書循良

送宗都運之長蘆

我家東海居目擊鰥丁苦民勞莫如農衣食自王土輸

官贏斗升小大得濡煦溟沙烈萬竈勺合盡官府燎薪
與募直一一挂文簿商課或不充輸錢為市補緡錙非
天墜貿易復何所不應為法初乃爾自相牾公私兩煎
迫稱貸日旁午窮年困炎歊肉盡繼肝膂坐令兼并徒
旦暮收拾伍微文牽積弊魚爛不可舉常思桑孔意寧
料遽如許必逢忠愛士重為整機杼宗君滄州行倚任
切當宁北南雖殊風物久理同蠱執炎思冷風止亢觀
霖雨予言未可窮君行念靡盬

程德望祠部登月亭

方塘開我前明月出我東仙人騎鶴來憩我亭之中調
笑弄月影徘徊吟天風夜久月漸高光滿池若空遺我
丹桂枝自攜白芙蓉飄然凌風去千里懷德容

飲酒

故人飲我酒坐我清湖潯中燕游後園俛首交綠陰側
磴度別渚回堂面長林西日明遠陂流光蕩我襟喟然
懷徃哲茲地幾登臨亭臺無遺構風水有餘音想當古

人時豈不亦似今運去鳴鳥寂時來蛩蠋吟無為後者
惜綠醕方在斟

記蠋

并序

蟲之毒者南方之即且北方之蠋即且能飛見
人輒疾走而蠋行甚緩聞人聲反止不動故多
為人得七月廿三夜聞牕間爬沙聲火燭之踞
而翹尾卓然可畏乃知其不動者蓋將以有為
也而蠋止以伺之其甚矣然卒以自斃悲夫

讀書心二三耳聞牕蝎走卷紙濡餘膏火起蝎在牕抑
首伏不行翹尾若有候人言蝎易得此意殊未究懷毒
乃忘身禍起遂莫救柳州憐蝮蛇釋械低予首因詩戒
宵人陰賊恒反受

張節婦詩

節婦京師人錦衣衛指揮僉事讓之女
許字華亭張少保鑒子昱昱卒女誓死

不嫁

妾面君未識妾心君豈知君死妾獨存誰當知妾悲父
母生我時願我有所歸生死向君家終我百歲期我非

慕共姜我非師伯姬自憐有此心不忍分兩岐皇天閔
嫠弱回光照孤闈大字表貞節黃金鑄門楣我女諒非
婦拜命慙恩私翻思摧裂初一死真如飴餘生已多祜
寧復知此為賢者有備責妾人無悔辭永抱一寸丹千
秋從是非

放船作

時初中
鄉舉

潛魚不出溱栖鳥不出林不因風雷便豈識天地之大
江湖深天風颭颭吹黃槐江船擊鼓凌晨開雲帆悠悠

渡三泖使我塵襟豁如埽將軍祠前芳草多陰廊古瓦
封苔窠英雄恨殺白衣櫓千載此地還來過陳湖北行
勢尤大氣象渾疑在天外波光黯慘迷西東我疑此處
藏蛟龍同舟之人半失色驚雷飲雪吹腥風出門咫尺
已如此況乃天涯千萬里

壬申正月十九日過北野同南村訪北花園廢址
明日北野有詩用蘇長公過清虛堂韻走筆奉荅
築隄不擬長安沙鳴鼓已放西曹衙夜游涇南鶴城北

隨處幅巾宜看花花林高下映叢冢池臺舊屬淇水家
當時笙歌沸鄰里只今古樹啼寒鴉先生讀書洞千古
過眼富貴如春葩時人不識競模擬徃徃背癢連衣爬
消憂滿貯北海酒破悶亦有南山茶家生小奴解新曲
時復羯鼓當軒撾郵筒徃復方此始一唱何止三人嗟
詩成揮翰向落日墨光繞筆飛玄霞

題計郎中汝和墨菊曹汝學家藏

郎中畫菊真是菊蒙泉蒲萄太常竹一時能事并馳聲

豈直文章難繼續狂揮急掃皆稱意不特品高機亦熟
西涯坐間生色障一見當時已心服不知何日到君家
淨洗朱鉛鬪清淑疎篁古木交映帶深淺生枯俱入態
歌風一枝驚欲折倚竹數叢如有待飛鸞墜羽時自壓
老蛟蛻骨令人駭張顛草聖久寂寞何意茲晨忽傾蓋
郎中郎中今有無後來尚遠眼中疎柔肌脆骨爭媚嫵
不然蔓草紛黃蘆頽波一去誰與返把卷撫玩增長吁
君不見近來淮海上亦有菊花一派徃徃傳京都

冬至謁陵次三江送行韻

初陽映雪暖欲蒸千門瑞氣通諸陵朝廷報本嚴奠埽
秩禮遠自前王興秋霜春雨意慘慘奩香篚帛心兢兢
高皇統天祀萬世奮自隴畝揮戟矜兩都並建始文祖
鼎命重為諸孫凝傳聞橋山初啓邑鸞輿玉趾幾降登
小臣何幸得將事敢論暑雨仍寒水經塗百里淨如埽
輿夫踴躍誇力勝迴龍小憩纔半道瞬息已覩洪仁燈
入門弛擔隨所適東寮西館各有朋山僧頻見頭亦白

為我載演牛車乘寒光凌亂入牕戶起視海月摩空升
瑤宮銀闕自萬古雖有晦蝕無虧增嫦娥悄立如有恨
欲斬桂樹嗟誰能齋居元不礙酬詠公詩險語何層層
磨厓擬刻永昭頌挽斷千仞寒谿藤

畫馬為內學生題

穆穆嫩綠垂楊短冉冉晴沙御堤軟驂騮行慣穩不驚
圉人徐牽不教速飛黃食料三品豐青絲綠首飄風駿
曾見沙場征戰苦方知此物是真龍

筠屋為徐庭美賦

徐君愛竹如愛玉種竹成林密如束林間結屋三四楹
自說此生心事足闌干一徑曲復曲落翠飛青暗人目
我疑月明深夜中定有青鸞屋頭宿

送謝司倉

寧知信宜邑乃在古高州地接朱鳶近天連碧海浮官
倉餘大米土俗罷綿裘莫作炎蒸慮男兒重遠遊

春日將適郊外忽暴風阻行

二月六日天氣惡卷地黑風吹倒人却看花柳俱無色
忽訝江山不似春高卧野人滋嬾散欲飛燕子自逡巡
東園有約不如意須待來朝理釣綸

家僮摘槐芽

小奴攜筐綠掩苒斜日歸自東鄰家青精未試仙子訣
冷淘的見詩翁誇人間正味竟何在天地育物真無涯
紫萸青苳更不惡高秋誰泛三江槎

題曲水草堂

二首

曲水村中景最幽也宜杖屨也宜舟白沙翠竹灣灣路
楊柳芙蓉歲歲秋

紫蟹行沙菊有霜紅蓮登岸白蓮香何人謾說桃源好
便有桃源是異鄉

送宋惟德分教池州

池陽風物似長沙第一名山是九華輸與能詩宋文學
芙蓉影裏岸烏紗

鄭岳八首

岳字汝華莆田人弘治癸丑進士歷官兵部左

侍郎有山齋淨稿

謝山子云侍郎深于諷諭之體

塞下曲

引弓兒騎射奄忽若星馳腥風吹馬來四面衝我師我
師勿輕動持滿以待之佯北勿輕追恐為彼所欺

九江阻風泊舟有感

白浪起層層峰頭雲正黑迴舟入小港聊茲一憩息路
梗難為期滄波浩無極坐觀北來船帆挂千仞直篙工

意閒暇津津動顏色緬懷造化心施予難為力往船風
宜南來船風宜北南北本異途彼此那俱得物理每循
環明朝未可測隱几澹無營冥心悟義易

過水口

建溪昔隱險橫流多怪石參差列牛馬廉利侔劒戟篙
工慣習水禱賽資神力前後互招呼分寸恐或失激盪
轟雷鳴沫流飛雪白諦觀毛髮豎一命試輕擲逶迤過
水口灘盡溪流碧櫂歌發清響貫酒娛西夕患至慮煩

紆險過事愉懌物理固其然臨流長太息

安肅南山有劉伶墓碑

鹿車一壺酒荷鍤以自隨云死即我瘞曠達不可羈如
何此墟曲有家高纍纍刻石紀道旁無乃好事為沈酣
弃禮法車服焉得維遭危固有託舉世人莫窺苦節多
湮沒怪爾名獨垂

秋水歎

黃河橫溢縣成渠人家半在水中居水邊漁父持空網

吁嗟無稻復無魚，鄰居相望隔河汜。
借貸無從飢欲死，樓船伐鼓晨夜過。
怒向縣官索夫米。

江行即事

府江江水惡，一歲九經過。
近午霧方散，中流石更多。
漁樵荒舊路，豺虎據深窩。
最念沿江戍，天寒獨枕戈。

野望

病告捐微祿，官閒帶舊銜。
提攜惟藥裹，嬾漫廢書緘。
海濶浮孤嶼，天空挂一帆。
吟眸隨處著，秋色滿衣衫。

簡姑蘇陳粹之憲副

吳苑鶯花滿舊墟先生翻笑出無車一官棄去還憂國
十口飢來只賣書短屐香生莎徑暖疎欄雲傍草堂虛
息息登拜慙予晚更報詩筒候起居

秦金一首

金字國聲無錫人弘治癸丑進士累官太子太
保南京吏部尚書贈少保謚端敏有鳳山詩集

落葉

半庭黃雛半庭紅萬點飛來禁苑東祇愛玉河秋色好
不因搖落怨西風

吳一鵬六首

一鵬字南夫長洲人弘治癸丑進士累官太子

少保南京吏部尚書贈太子太保謚文端有集

詩話尚書名位與原博濟之鼎峙中吳詩雖不
敵原博品在濟之伯仲之間原博闢一鶴園于
都下中有玉延亭海月菴及以憂去推尚書居
焉趙栗夫過之謂其亭曰借玉謂其菴曰借月
尚書詩所云乾坤浩蕩誰其主丘壑風流
我所私也詩集十卷選家罕有錄之者

塞上曲

去年搜河套今年搜河套河套水草多反以資寇盜歎
息漢將軍旌麾幾曾到

官軍行

團營素操練精銳稱禁軍平時跨鞍馬揚揚氣凌雲山
東苦多盜勢將及并汾上怒乃遣將徂征如救焚云何
負委託寇至若罔聞畏縮鮮關志久不樹功勲遂令崔
符輩所在皆成羣生能拔牛角古不有孟賁死能鞭荆

尸古不有伍員賈勇今已矣肉食徒紛紛民間且被害
敢怒不敢云黷貨殘富室肆淫裂完裙忍以盜攻盜罪
惡何區分勸汝早悔過直前破妖氛所貴出死力奏捷
慰吾君

知足篇戲效樂天

我生幸為男魚米況鄉俗恬然熙洽餘蹤跡混樵牧父
母教我書早已竊君祿優游翰墨林職業少拘束退朝
時閉門爐茗清可掬有書讀幾章有紙揮幾幅有酒飲

幾杯有詞歌幾曲客來或棊枰家居祇常服且有膝下
兒家聲亦能續俯仰天地間我意無不足敢云求大官
朱軒映華屋福過災恐生撫已覺顏忸吳江舊遺田聊
以具饘粥為賦歸去來奚俟詹尹卜

過李海務

海國茫茫裏輕帆整復斜楊花低度水萍葉細黏沙魚
米三家市風烟一樹鴉不須嗟落寞吾意本天涯

開河阻船慰同行諸君

水宿風餐君莫愁他鄉聊復當春游花間啄食鳥紅尾
沙上浣衣僧白頭三戶人烟看漠漠百年身世任悠悠
關河過此知無礙萬里長風吹客舟

查夏重云三四極似子瞻

節後見菊

重陽已過十餘日纔見疎籬菊有花厭逐紛華供俗眼
獨留冷淡伴詩家清霜數日水邊淨落日一枝風外斜
為汝秋深慰蕭索酒酣聊取插烏紗

曹 鑠 四首

鑠字良金吳江人弘治癸丑進士改庶吉士授

刑部主事進員外郎調東昌府通判遷興化府

同知擢湖廣按察司僉事有林歸集

蔣慕皆云太史詩不

學唐不擬選而寓託深至迴出意表

詩話良金仕未通顯而能力攻中貴人直節不易
及歸田之後娛情繪事興到題詩于所居宅後
積土為山植桐其上名曰桐丘句如一片酒旗
春雨店數聲漁鼓夕陽村鵝翎白綴霜前菊鱣
血紅生雨後柑剪紙為屏遮破屋牽蘿補屋透
斜曛軒牕影暗梧桐密籬落香飄枳殼開漁鼓
喚人駭轉急酒旗招客
挂偏高頗類白石翁

楊白花

楊白花輕且微春風吹逐何處飛春陰冥濛千萬里花
小不愁飛不起重門深鎖寂無人夜永如年月如水

山家圖

茅屋青山裏居人不務耕雨晴攜短鋤隨處掘黃精

秋郊晚眺

潮落寒江淺沙陂露水痕漁人歸曬網撾鼓入遙村

菊花

霜落天涯草木稀
疎花秋晚獨芳菲
平生不愛杯中物
嬾向西風望白衣

陸相一首

相字良弼餘姚人
弘治癸丑進士累官長沙知府有吳舫集

寶應道中

百里平湖水輕帆次第過
魚鰕攢曉市鷗鷺浴寒波
霧塔籠鬟髻秋花艷綺羅
十年淮海夢愁絕竟如何

許天錫一首

天錫字啓衷閩縣人弘治癸丑進士改庶吉士授吏科給事中歷工科都給事上疏劾劉瑾為瑾所殺嘉靖中追賜祭葬有黃門亭

詩話黃門奉使安南却其贖賦詩云菁茅又喜重色貢蕙苴何須滿載歸比歸劉瑾疑其金多不知其不受餽也黃門之死瑾矯詔逮問潛遣人殺之而撰府志者或謂其自經或謂是夜尚草疏皆謬當以世宗實錄為正鄭少谷詩云風流不見許黃門遺字丹青閣上存却留詩句車盤驛黃犢青山何處村蓋黃門過車盤驛曾題詩壁間有青山對面疑無路黃犢出林知有村之

句為時所稱謝在
杭亦有詩紀其事

楊白花

春宮深深春晝長
楊花起舞春雲香
隨風忽度江南水
蕩漾楊花幾千里
楊花流落向天涯
宮樹朝鴉復暮鴉

杭濟

濟字世卿宜興人
弘治癸丑進士官至布政使
有澤西集

東溪小隱

清溪東畔隱君家幽事人將擬浣花垂柳蔭牆緣岸仄
短莎分徑入門斜春風到處隨吟杖秋水閒來放釣槎
了却百年終隱計更無飛夢到東華

柳枝詞

玉溝縈繞水烟涼嫩葉垂垂窄地長百尺宮牆遮不到
飛花猶自入昭陽

杭淮十四首

淮字東卿濟弟弘治己未進士累官南京總督

糧儲右副都御史有雙溪集

王道思云東卿詩雖體製錯出律調

不同而歸之嚴整雅健格高而意正音舒而節越無嫫媚之習粉澤之飾有前代作者之風
俞汝成云孝廟以還李何二公首倡詩學一時揚袂而起者如徐迪功熊士選康對山王浚川輩不啻數十家宜興杭澤西雙溪昆季亦同聲而應者也

詩話雙溪詩極其道鍊如繭絲抽自梭腸似澀而有條理五言尤擅場可亞少谷

復送世恩得鳥字

朔風吹客衣寒葉辭木杪晨發城東門
君馬白驤襄南北紛多岐聚散感鷗鳥
蹤跡雖屢違毋使聲聞杳相望

江一涯素月出皎皎

送劉美之太守赴銅仁

園柳何青青江草萋以碧送子適萬里執手情脈脈嗟
彼雲中鴈翱翔依沙磧不為稻粱謀何以有南北努力
慎所之悠悠豈終隔

早發巢縣暮宿金城寺

烟靄市上青霜露草根白日出雞尚鳴墟落溪南北涉
野多寒風枯楊何蕭索山川莽迢遞歲晏道路迫王事

苦未休慘澹逾郡國暮逢禪房幽且復舒枕席

送王陽明謫官龍場驛

白日野中微浮霾結朝陰送子遠行役躑躅傷我心豈
無良朋儔不如子同音寂寞投窮荒誰能念浮沉願為
雙玉軫相隨麗瑤琴

送徐石東僉湖南分題得瀟湘

瀟湘他日夢

自注石東嘗夢官于此

今上合江亭天闊浮吳楚山

青入洞庭鷓鴣春渺渺斑竹雨冥冥舟楫雲中見依稀

帝子靈

西行回度滇池

西行苦歷險落日放舟還
海草微茫際沙鷗出沒間
烟青金馬寺天遠碧雞關
諸嶺雲端出如看震澤山

打牛坪驛

諸葛孔明
迎春於此

亭因卧龍舊猶載打牛坪
耕戰紆經略春秋幾送迎
野花空晚落蔓草自春生
悵望三分蹟流傳後代名

山水小畫和韻

金碧披毫末江山入座中橋分沙岸水樹繞石林風已
覺滄洲遠還疑玄圃通生綃僅盈尺萬里對無窮

清平道中

亦知春久去花尚滿陵岡小朶穿籬白微風過馬香清
平蒙伐罪苗獐識尊王鹽米通吳蜀人今無異方

鎮遠喜即舟

連山霧不開壑轉一溪迴洶洶奔湍下濛濛細雨來巫
山疑有峽灩澦不成堆撇旋看舟子乘流亦快哉

雨中登樓

節序黃梅候朝陰
午不開浮雲暗山去急雨灑城來高
艷紅葵濕低翔白鷺迴洗心亭咫尺烟靄擁層臺

新正二日發宜春次王陽明韻

宜陽山前莎草痕
春泥釋釋水流渾客行遠道無停轂
人拜新年不出村三日暄蒸北風作
清明陰霾江氣昏
野館蕭條亦足賴梅花為我招吟魂

經盤江次劉元瑞韻

踰岡陟嶺兼多病臘盡春來不記程瘴水已知多客淚
窮山只是有人行緣崖晝霧愁俱黑觸馬春花眼一明
西蜀未知天下險老夫筋力盡南征

王思槐過訪押韻

泊船郊扉暑雨清小樓山外恰新成打魚剪韭無他味
把酒論文見客情野竹過牆初挺拔林花照眼更分明
新禾滿地農歌起白首對君懷一傾

王良佐 五首

良佐字良弼松江華亭人弘治乙卯舉鄉試選

靖海教諭遷知廣濟縣有鶴坡集

孫貞父云鶴坡雅志高古

庸腐語洵洗殆盡如古仙劍客超脫塵外又云鶴坡抱負自許惜不用于世常有咨嗟慨歎之

意其詩超拔自喜終欠沉實

詩話鶴坡與戚韶龍困張冕一桂同居松江之珠涇咸有詩名孫文定刊三詩翁集行之王作較勝其與儲黃論詩云幾許門牆黃太史三分局面鄭都官其實派出石田頗饒清曠之致

招張一桂

日日草堂江上開竹間亦有小亭臺酒杯欲棄那忍棄

吾子不來誰復來
案上離騷讀初罷
坡頭獨鶴放仍回
湖山每索驚人句
須得張郎八斗才

九日過九江

一舟西下繫垂楊
忽值黃花夾岸香
逢著故人汪太守
九江城裏過重陽

舟次

社公祠前五日雨
白馬湖頭三尺潮
客子掀篷正無賴
隔船何處一聲簫

暮渡江

沙頭燈火見樓臺黃帽那堪隔岸催
舊日風流王博士
又吹長笛過江來

紅牡亭

沉香亭北午風微香霧濛濛燕子飛
三十六宮春色好
大家齊試絳羅衣

明詩綜卷三十一